



**Francisci De Fargna Civitatis Plebis Patrii Philosophiæ,
Sacræ Theologiæ, ac J. U. Doctoris ... Commentaria In
singulos Canones De Jurepatronatus**

Qui sparsim tam intrà, quām extra corpus Juris Canonici vagantur ...

**Fargna, Francesco de
Romæ, M. DCC. XIX.**

Casus II. Argumentum. Episcopus ut validè taxare possit beneficia Jurispatronatus ad effectum contribuendi Necessitatibus Seminarii, quæ requirantur? Hujusmodi Taxa qualis, & quanta esse debeat? Et ...

[urn:nbn:de:hbz:466:1-72172](#)

illi inserviunt administrare, excepta Communione Paschali.

ARGUMENTUM.

Episcopus, ut validè taxare possit beneficia Jurispatronatus ad effectum contribuendi necessitatibus Seminarii, quæ requirantur? hujusmodi Taxa qualis, & quanta esse debeat? Et an Beneficia Jurispatronatus uniri valeant Seminario?

S U M M A R I U M.

- 1 Episcopus taxare potest beneficia Jurispatronatus pro necessitatibus Seminarii: & num. 3. Amplia, ut ibi; Limita, ut numer. 2.
- 4 Enumerantur requisita necessaria ad hoc, ut Beneficia Patronalia validè taxari possint ab Episcopo. & num. 7. 8. 13. 15. & 16.
- 5 Cessante necessitate Seminarii, in totum, vel in partem; in totum, vel in partem cessare etiam debet Taxa beneficiorum.
- 6 Seminarium est reintegrandum ad fructus beneficiorum vigore Brevis Apostolici, alicui Collegio addictorum, si cessef necessitas hujus Collegii.
- 8 Capitulum solvere debet Taxam Seminario, de fructibus Præbendarum, aut Beneficiorum sibi unitorum, non verò de distributionibus quotidianis, & aliis emolumentis incertis, & num. 9.
- 10 Episcopus constringere potest Abbatias, Prioratus cujuscumque Ordinis, & Hospitalia ad contribuendum Seminario. Intellige ut ibi
- 11 Religio Hierosolymitana est exempta à contributione Seminarii.
- 12 Monachi Cœlestini non tenentur contribuere Seminario.
- 13 Cappellania merè laicalis, aut legatum Missarum, seu dotum non tenetur contribuere Seminario; & num. 14.
- 17 Taxa Beneficiorum Patronalium facta, absque consilio Deputatorum non sustinetur.
- 18 Quantitas Taxa solvenda Seminario qua-

- lis esse debeat; & quo tempore sit solvenda? Vide num. 19.
- 20 Diminutis fructibus Beneficiorum jurispatronatus. Taxa etiam est proportionabiliter diminuenda.
- 21 Beneficia jurispatronatus uniri non possunt Seminario absque consensu Patronorum.
- 22 Alia Beneficia simplicia uniri possunt Seminario, sed pro illorum unionis validitate, multa requiruntur; & quæ sint hujusmodi requisita. Vide ibi; & num. 24. 25. & 26.
- 27 Seminarium quando dicatur erectum?
- 28 Unita auctoritate Apostolica Abbatia spectante ad Ecclesiam Collegiatam Seminario cum omnibus suis fructibus, redditibus, proventibus, juribus, adjacentiis, hujusmodi Unio, quid comprehendat? & an illius vigore regimen, & manutentio ejusdem Ecclesie, necnon deputatio Sacristæ, & aliorum Ministrorum, spectet ad Superiores Seminarii? Vide ibi, & num. 29. 30. 31. 43. 44. Amplia ut num. 41. & 42.
- 32 Unio quando dicatur subjectiva? Vide ibi, & num. 35.
- 33 Unio subjectiva, an, & quæ jura transfert in Ecclesiam, seu Seminarium, cui Beneficium unitur. Vide ibi, num. 34. 39. & 40.
- 36 Declaratio nihil de novo addit, sed simpliciter ostendit, quid per antea factum erat.
- 37 Erecta Abbatia in Collegiatam cum preservativa jurium Abbatie, non diminuntur in aliquo jura Abbatie, nec Abbatum pro tempore jurisdictione.
- 38 Ut in mutatione status Ecclesia extinguantur jurisdictione, & privilegia alicujus, quid requiritur?
- 45 Seminarium sentiens onus, & incommode expensarum, & manutentionis Ministrorum, sentire quoque debet commodum deputationis eorumdem.
- 46 Unita Abbatia spectante ad Ecclesiam Collegiatam Seminario, hujus Superioris non tenentur eligere Ministros de gremio Capituli.

CA.

C A S U S I I .

ERexit quidam Episcopus in propria Dioecesi Seminarium, & pro ejus sustentatione taxavit inter cætera duo Beneficia Patronalia in scutis sex; absque consilio Deputatorum, Rectores hujusmodi Beneficiorum renuunt summam taxatam Seminario contribuere, eo sumpto motivo, quod non fuerit per Episcopum in taxandis his Beneficiis adhibitum consilium Deputatorum; Quærerit an Taxa Seminarii in scutis sex super dictis Beneficiis in hoc casu sustineatur?

3 Videtur respondendum affirmativè; potest namque Episcopus vigore facultatis sibi in hoc Canone tributæ taxare Beneficia jurispatronatus, & hæc tenentur contribuere Seminario, etiam si sint possessorum à Prælatis Domesticis Summi Pontificis juxta sensum S. Congregationis Concilii in Cœfaten. Taxæ Seminarii 19. Aprilis 1704., dummodo in limine eorum foundationis secutæ post Concilium non fuerit de consensu Ordinarii apposita conditio, ut ad nulla onera teneantur; dum si talis conditio fuerit à Fundatore apposita, vel fuerit expressè cautum, quod neque Seminario contribuere debeant, tali casu Beneficia jurispatronatus, ad hujusmodi contributionem minimè tenerentur, ut resolutum fuisse à S. Congregatione Concilii testatur Pignattell. consult. 31. nu. 137. tom. 9. Nicol. in floscul. verb. Seminarium num. 9. Unde renuentes præfati Rectores solvere dictam Taxam Seminario, cogi possunt ab Episcopo ad illius solutionem per censuras Ecclesiasticas, & alia juris remedia juxta præscriptum hujus Canonis.

3 Hoc tamen non obstante contrarium sentio; Verum quidem est, & nullatenus controvertitur, quod Episcopus taxare valeat Beneficia Patronalia pro alimonia Puerorum, mercede Ministrorum, & aliis expensis necessariis Seminarii, sed ut hoc per ipsum validè fieri possit plura requiruntur.

4 Requiritur enim primò, necessitas Seminarii, seu quod hujus redditus non reperiantur, vel adeò tenues sint, ut non sufficiant pro expensis fabricæ, mercedis Ministrorum, alimonia Adolescentium,

Pars V.

& aliorum necessariorum, seclusa siquidem hujusmodi necessitate nulla Beneficia contribuere tenentur Seminario; imò si post taxata Beneficia Seminarium ex piorum Fidelium dispositione: vel aliunde sufficienter dotetur, vel aliquid lucretur, tunc vel cessare debet in totum Taxa, vel quantum lucratum est, tantumdem de Taxa est demendum, ea ratione, quia Taxa imposita favore Seminarii de tempore, quo erat in paupertate, & indigebat subventione, habet tacitam conditionem, donec superveniant divitiae. Ventrigl. in prax. par. 2. annot. 29. §. unic. num. 41. Leoncill. de Privileg. paup. par. 2. priv. 338. nu. 5. Card. de Luc. de benef. disc. 88. nu. 2. Rot. decis. 635. num. 5. & 7. coram Cerro. **6** Imò ipsummet Seminarium est reintegrandum ad medium decimam, & fructus Beneficiorum, quæ vigore Brevis Apostolici sine addicta alicui Collegio, si cesseret necessitas hujus Collegii, & hoc aliunde acquisierit redditus sufficientes pro alimonia competentis numeri Religiosorum, ut definitivit S. Congregatio in Melevitana Seminarii 31. Julii 1706. subscribens; esse reintegrandum Seminarium ad Beneficia alias sibi unita, nec non ad contributiones, & emolumenta alias Ven. Collegio Societatis JESU Civitatis Valletæ à san. mem. Clemente VIII. applicata; stante quod detractis omnibus detrahendis, adhuc supererant Collegio annua scuta 2365. pro alimonia duodecim Religiosorum sufficientia; quæ resolutio confirmata fuit 2. Octobris ejusdem anni, & 2 Augusti 1710. ad primum.

7 Secundo requiritur, quod Episcopus taxet hujusmodi Beneficia, & cogat eorum Rectores contribuere Seminario cum consilio quatuor Deputatorum, duorum videlicet de Capitulo, quorum alter ab Episcopo, alter vero ab ipso Capitulo sit electus, & duorum de Clero, quorum pariter alter ab Episcopo, & alter à Clero eligatur, Ventrigl. in prax. par. 2. annot. 29. §. unic. num. 13. Barbos. hic nu. 10. Pignattell. consult. 36. num. 9. tom. 8. Monacell. formular. legal. 2. tit. 12. num. 1. par. 1.

8 Tertio requiritur, quod Episcopus antequam taxet, & constringat Beneficia jurispatronatus contribuere Seminario debet primò, & ante alios ipse ex mensa sua,

Q

sua.

sua, taxam, & portionem solvere; deinde potest taxare Capitulum Cathedralis, & Beneficia eidem Capitulo unita ad effectum contribuendi Seminario, ut fuit resolutum ab eadem S. Congregatione Concilii in Boven. Taxa Seminarii 12. Januarii 1709. ubi taxatis per Episcopum Boven. Communeria, ut vocant, Capituli Cathedralis in ducatis decem, & binis Beneficiis sub invocationibus respectivè SS. Leonis, & Pantaleonis eidem Communerix unitis in ducatis sex cum dimidio, & contributis à præfato Capitulo summis taxatis Seminario per multi temporis spatium, cùm renueret postea eas persolvere, sub motivo, quod redditus tum Communeræ, tum dictorum Beneficiorum deservirent pro distributionibus quotidianis, è quibus Taxa non debetur Seminario proposita fuerunt infra scripta dubia, nimurum Primo = An Taxa Seminarii in ducatis decem super Communeria Cathedralis Boven. sustineatur = Secundò = An eadem Taxa Seminarie debeatur à Capitulo pro Beneficiis eidem unitis in casu &c. = Quibus responsum fuit ad utrumque affirmativè.

9. Et quidem Capitulum debet solvere Taxam Seminarii de Præbendis, & beneficiis, non verò de distributionibus quotidianis, aut aliis emolumentis incertis provenientibus à legatis, & ex eleemosynis Fidelium; Deindè debet constrin gere Abbatias, & Prioratus cujuscumque ordinis, dummodo Abbatia, non sit nullius, seu non habeat Territorium separatum, & habeat jura Episcopalia; Hospitalia, quæ dantur in titulum, vel administrationem si habeant Beneficia annexa, contribuere Seminario certam portionem ex eorum fructibus; Quibus omnibus priùs taxatis, taxari potest beneficia juris patronatus etiam regularia, & etiam si sint unita Monasteriis Mendicantium, & Monialium, dummodo non spectent ad 11 Ordinem, seu Religionem Hierosolymitanam, quæ eximitur à Concilio ab hujusmodi contributione Seminarii; & Rectores eorum tenentur, & constringi possunt sub pœnis censurarum solvere taxam ei Seminario, in cuius Diocesis situm est beneficium, etiam si hoc habeat bona in aliena Diocesi. Barbos. hic n. 12. & 17. cum seqq. & de offic. & potest. Episco-

pi par. 3. alleg. 77. n. 2. Ventrigl. in prax. par. 2. dicta annot. 29. §. 2. n. 14. cum seqq. Card. de Luc. in annot. ad Concil. disc. 25. n. 3. cum seqq. Pignatell. consult. 13. n. 1. & 8. tom. 8. & consul. 81. num. 26. & 94. tom. 9. Monacell. formul. legal. 1. tit. 12. par. 1. num. 3. R. P. D. meus Petra in Comment. ad Constit. Apostolic. secundam Urbani VI. num. 33. tom. 4. pag. 347. Monachi 12 tamen Coelestini nou tenentur solvere contributionem Seminario, ut fuit sensus dictæ S. Congregationis in Oppiden. Contributionis 16. Novembris 1715., eo quia sunt exempti vigore Constitutionis Sancti Pii V., non obstante, quod S. M. Gregorius XIII. Pianam constitutionem moderatus fuerit, dum quoad Seminiorum contributionem, exemptio intacta remansit.

13 Quartò requiritur quod Beneficium, quod taxatur, sit Ecclesiasticum, seu erectorum auctoritate Ordinarii, nam si sit Capellania merè laicalis, vel amovibilis cum onere Missarum de jure patronatus, quæ impropriè dicitur Beneficium, hæc non est taxanda, nec tenetur contribuere Seminario, quia habetur ad instar reliqui, seu legati pro celebratione Missarum, quod non comprehenditur sub dispositione hujus Canonis ad effectum solvendi, & contribuendi Seminario. Gonzal. ad Regul. 8. Cancell. gloss. 5. n. 5., & alii penes Panimoll. dec. 21. n. 1. & seq., S. Congregatio Concilii in Sabinen. 26. Maii 1640. lib. dec. 16. pag. 380. ad secundum. Sicuti

14 non sunt taxanda Legata Dotium favore Puellarum, aut alicuius pecuniarum subministracionis favore piæ Causæ, neque ab eis detrahenda aliqua summa pro sustentatione Seminarii, ut rescripsit sèpe dicta S. Congregatio Concilii in Camerinen. Erectionis Seminarii 15. Martii 1710., ubi institutis hæredibus universalibus à quodà pio Testatore Caonicis Collegiatæ Ecclesie S. Urbani Terræ Apiri, inter cætera fecit sequens legatum = L'altra entrata, che avanzarà dopo li beneficiati, voglio che serva per maritare tante Zitelle, quante poteranno consumare detto avanzo, e quante ve n'entraranno, volendo, che sì diano cinquanta scudi di moneta per ciascuna &c., e occorrendo, che qualche anno non vi füssero tante zitelle, che consumassero tutto il sopravanzo dell' entrate, che restasse dopo l'
augu-

augumento alli Canonici , e l'entrata delli Beneficiati , voglio , che di esso sopravanzo se ne faccino tre parti , una se ne dia alle Monache di S. Chiara , la seconda alle Monache di S. Maria Madalena ; e la terza alla Compagnia del Santissimo Sacramento d' Apilo , acciò si compri tanto grano per imprestare a' Poveri &c. Canonici autem dictæ Collegiatæ attento , quod redditus hereditarii assignati à Testatore pro maritandis Puellis pingues admodum , & exuberantes evaserint , ascendentis ad annuam summam scut. 1350. exorarunt , ut ex præfata summa detrahantur annua scuta 350. pro sustentatione Seminarii erigendi in dicta Terra Apiri , pro alienis , & religiosè educandis Pueris in Ecclesiastica Disciplina , quam sanè voluntatem ejusdem Seminarii in eo oppido fundandi fassi sunt habuisse ipsummet Testatorem , unde proposito dubio \square An , & quomodo Oratorum precibus sit annuendum \square Rescriptum fuit \square Negativè , & servetur voluntas Testatoris \square .

15 Quintò requiritur , quod in taxandis Beneficiis Jurispernatus habeatur per Episcopum ratio alimentorum , quæ debentur Patrono , si sit inops , & aliorum onerum , hæc enim priùs deducenda sunt , & de eo , quod superest , facienda est contributio Seminarii . Ventr. in prax. p.2. annot. 29. §.2. num. 39. Barbof. hic num. 14. Pignattell. consult. 81. n. 24. & 57. tom. 9. Monacell. formul. legal. 1. n. 7. & formul. 2. num. 5. tit. 12. par. 1.

16 Sextò requiritur juxta Pignattell. consult. 36. n. 2. & seqq. tom. 8. quod Seminarium sit erectum , seu quod Alumni sint jam ibi introducti . Sed ego censeo hoc requisitum non esse necessarium ad effectum , ut Episcopus validè taxare possit beneficia Jurispernatus , aut alia quæcumque beneficia , dum Concilium in hoc Canone dat facultatem Episcopis taxandi beneficia non solum pro alimentis Alumnorum , pro mercede Ministrorum , sed etiam pro Fabrica Seminarii instituenda , ibi \square Et quia ad Collegii Fabricam instituendam &c. \square & sic dat facultatem Episcopis taxandi beneficia Seminario adhuc non erecto , sed erigendo . Quin obstet decisio S.Rotæ 836. par. 4. divers. quia hæc loquitur de unione beneficiorum , quæ non debet fieri Seminario Pars V.

nondum erecto , ut dicemus infra , non verò de impositione Taxæ ; Imò Pignattellus videtur sibi contrarius dum consult. 81. n. 48. tom. 9. approbare videtur resolutionem S. Congregationis Concilii in Faventina , ubi decretum fuit \square Episcopus pro fabrica Seminarii , vel pro instaurazione Domus Seminarii potest taxam exigere , licet adhuc Juvenes non sint in illud introducti \square .

17 In casu præsenti deficit secundum requisitum ; quia Episcopus taxavit illa duo Beneficia Patronalia in scutis sex , nullatenus priùs exhibito Consilio Deputatorum , & consequenter hujusmodi taxa super dictis Beneficiis , in hoc casu sustineri non valet .

18 Quantitas verò Taxæ solvendæ Seminario , debet esse talis , qualem Episcopus fuit solitus exigere , & reperitur in possessione exigendi : et si non adsit talis consuetudo ; Episcopus Taxam constitutere debet juxta qualitatem Beneficii , Loci , & Diœcesis ubertatem , nimirum usque ad decimam integrum , vel plus medietate Decimarum , si expedire judicaverit ; alibi enim summa duorum cum dimidio pro centenario sufficit , & alibi etiam quatuor approbatur . Ventr. in prax. p.2. annot. 29. §.2. n. 39. Pignattell. consult. 81. n. 76. & 126. tom. 9. Nicol. in floscul. verb. Seminarium num. 3. Monacell. formul. legal. 12. tit. 12. num. 6. par. 1.

19 Quæ Taxa sic ab Episcopo constituta , solvenda est Seminario juxta consuetudinem loci ; in pluribus locis solvitur anticipatè de quadrimestri in quadrimestre , & in pluribus aliis locis de semestri in semestre . Ventr. ubi supra n. 38. Barbof. hic num. 15. Pignattell. ubi supra num. 86. Et si 20 contingat quod fructus Beneficiorum Jurispernatus diminuantur , Taxa etiam est proportionabiliter ad diminutionem fructuum reducenda , ut resolutum fuisse à S. Congregatione Concilii in Romana 26. Januarii 1697. testatur Bertachin. vot. decis. 118. n. 1.

Duo media præscripsit in hoc Canone Concilium Tridentinum ad effectum subveniendi necessitatibus Seminarii , Taxam nimirum beneficiorum , & horum unionem . De Taxa jam superius vidimus , nunc videndum est de unione ; an videbitur Beneficia Jurispernatus , aut alia

- Beneficia simplicia uniri possint Seminario, & quid requiratur pro eorum unionis validitate.
21. Quidam Beneficia Jurispatronatus respondeo, quod licet haec ex supradictis taxari possint pro necessitatibus Seminarii, tamen huic uniri nequeunt sine consensu Patronorum. Barbos. hic num. 34. & 37. Ventr. in prax. par. 2. dicta annot. 29. §. unic. num. 45. Rot. dec. 16. num. 7. & seq. coram Peutinger.
22. Respectu verò aliorum Beneficiorum simplicium, illa quidem uniri possunt Seminario; sed pro eorum unionis validitate plura requiruntur; Primò namque requiritur necessitas Seminarii, si enim unio fieret causa commodioris sustentationis, vel amoenitatis, & recreationis gratia, ipsa non sustineretur, Lotter. de re benef. lib. 1. quest. 29. n. 60. Ventr. ubi supra n. 42.
23. Requiritur secundò, quod unio fiat cum Consilio quatuor supradictorum Deputatorum; Turr. de union. benef. cap. 9. num. 18. Antonell. de regim. Eccles. lib. 3. cap. 8. num. 22. Frances. de Eccles. Cath. cap. 28. num. 472. & seqq., ubi quod Episcopus tenetur requirere, sed non sequi Consilium; unio aliter facta, quam sine eorumdem Deputatorum Consilio non valet Garz. de Benef. par. 12. cap. 2. §. 2. n. 190. Pax Jordan. Lucubrat. lib. 10. tit. 32. num. 29. Ricc. in prax. rer. Eccles. tom. 1. resol. 390. n. 3. Leo in Thesaur. for. Eccles. n. 2. cap. 31. num. 24. & seq. Barbos. de offic. & potest. Episcopi part. 3. alleg. 22. n. 33. Castropal. oper. moral. tom. 2. tract. 13. de Benef. disp. 6. punct. 12. §. 3. n. 15. Lotter. de re benef. lib. 1. quest. 29. n. 60. Pignattel. cons. 77. per tot. tom. 1., ubi quod Consilium requiritur in ipso actu unionis, alias non suffragatur Rot. in Nucerina Paganorum Beneficii 6. Julii 1712. §. De hoc sane, & §. Et quidem, coram R. P. D. Crispo, ibi \sqcap Possunt enim uniones, quae cum consensu explentur, ex superveniente consensu re convalidari, non sic verò uniones, quae mediante consilio deputatorum perficiuntur, in quibus se consilium ab initio adhibitum non fuerit, de sui natura ex intervallo suppleri non potest, cum pro actus validitate omnino præcedere necesse sit \sqcap Nec sufficit consensus Capituli; ut tuerit eadem Rota in dicta Nucerina Paganorum
- Beneficii ubi supra §. Nec forma.
24. Requiritur tertio, quod præcedat Taxa, seu dismembratio fructuum ipsius Cathedralis, & aliorum Beneficiorum Diœcesis proportionabiliter, & si hoc non præcedat unio est nulla; Gonzal. ad regul. 8. Cancell. gloss. 5. §. 7. sub n. 25. vers. ac etiam. Turr. de union. benef. cap. 9. num. 28. Ventr. in prax. par. 2. annot. 29. §. unic. num. 42. Lotter. de re benef. lib. 1. q. 29. n. 61. Rot. decis. 32. n. 2. & 361. n. 7. par. 2. rec.
25. Requiritur quartò, quod Beneficia, quæ uniuntur, non sint S. Sedi Apostolicæ reservata, dum post Decretum Clemencis VIII. hac de re editi, & confirmati ab Urbano VIII. Beneficia reservata, & S. Sedi affecta, Seminario uniri non possunt. Fagnan. in cap. sicut unire de excess. Prælat. num. 49. Pignattell. consult. 81. num. 40. & seqq. tom. 9.
26. Requiritur Quinto, ut Seminarium sit formaliter erectum. Barbos. hic num. 11. & de offic. & potest. Episcopi part. 3. alleg. 77. n. 23. Lotter. de re benef. lib. 1. quest. 29. num. 47. Carol. Anton. de Luc. ad Gratian. discept. 358. n. 5. Card. de Luc. in annot. ad Concil. disc. 25. num. 15. Pignattell. consult. 36. n. 4. tom. 8. Monacell. formul. legal. 1. tit. 12. num. 2. par. 1. Rot. dec. 361. num. 3. par. 2. & decis. 373. n. 2. par. 4. tom. 2. rec., & est sensus S. Congregationis Concilii in Lycien. unionis 16. Maii 1711., ubi declarata fuit nulla unio Ecclesiæ Sanctissimæ Annuntiatæ Terræ Squintiani, facta ab Episcopo de Consilio Deputatorum, Seminario Lycien., eo quia fuerit sequita ante Pueros introductos in Seminarium, & non citato Capitulo, seu Clero Squintiani, sub cuius administratione eadem Ecclesia existebat, & ex dispositione cuiusdam fœminæ, quæ ante dictam Ecclesiam ex piorum fidelium elemosynis collectis ædificavit, & sub administracione ejusdem Capituli; & ipsius Communiantis supposuit.
27. Seminarium autem dicitur erectum, ad effectum validè ei uniendi beneficia, si fuerit conducta, vel empta domus, & introducti Pueri, electi Rectores Seminarii, & Consultores pro instituendis Taxis, & faciendis unionibus Lotter. de re benef. lib. 1. quest. 29. num. 51. Barbos. de offic. & potest. Episcopi part. 3. alleg. 77. n. 24. Turr. cell.

cell. de union. cap.9. num. 27. Ventrigl. in
prax. par.2. dicta annot. 29. §. unic. n.42.
Rot. dec.361. n.5. par.3. rec. & dec.373.
n.9. & seqq. par.4. tom.2. rec.

28 Unito autem beneficio simplici, aut unita auctoritate Apostolica Abbatia spectante ad Ecclesiam Collegiatam Seminario, cum omnibus suis fructibus, redditibus, proventibus, juribus, adjacentiis, hujusmodi unio, non solum comprehendit fructus, sed etiam Jurisdictiones, Præminentias, Collationes Beneficiorum, aliaque omnia jura, & illius vigore regimen, & manutentio ejusdem Ecclesiae, nec non deputatio Sacristæ, & aliorum Ministrorum inferiorum, non amplius spectat ad Capitulum, sed ad Superiores Seminarii, qui non tenentur illos eligere de gremio Capituli; ut resolutum fuit à S. Rota in Neapolitana Unionis, & in alia super Deputatione Ministrorum 23. Junii 1710. cor. Reverendissimo Molines, hic immediate legen.

Rmo MOLINES DECANO

Neapolitana Unionis.

Luna 23. Junii 1710.

AD sedandas multiplices controversias dudum exortas, & diuturno tempore agitatas inter Archiepiscopos Civitatis Neapolitanæ, & Rectores, seu Abbates nuncupatos Collegiatæ, & Parochialis Ecclesiae Sancti Joannis Majoris ejusdem Civitatis nedum super exemptione Rectoriæ à Jurisdictione Archiepiscopi, & jurisdictione activa in Hebdomadarios dictæ Ecclesiae, quæ privativè ad Archiepiscopum ad se spectare contendebat Rector, seu Abbas, verum etiam super regimine dictæ Ecclesiae, ac super collationibus Beneficiorum, ac denique super jure instituendi præsentatos ad Beneficia de jurepatronatus in eadem Ecclesia fundata. Anno 1584. stipulata fuit inter Partes concordia in forma specifica subinde per Sanctam Sedem confirmata, juxta quam declaratum extitit, ut tam Rector, quæ Hebdomadarii deberent esse subjecti Jurisdictioni Archiepiscopi, quodque ad Rectorem, seu Abbatem spectaret in mensibus Sedi Apo-

stolicæ non reservatis conferre Hebdomadarias, aliaque dictæ Ecclesiae Beneficia, ita tamen, ut collationes præsentari deberent Archiepiscopo ad hoc, ut Collatarii ab ipso idonei judicarentur; quo verò ad Beneficia jurispatronatus in dicta Ecclesia fundata concordatum fuit, quod per Curiam Archiepiscopalem proponi deberet Edictum, formari processus, & sententia ferritam super præsentatione, quæ super cognitione Jurispatronatus, & quod præsentati pro habenda institutione remitti deberent ad Abbatem, ad quem spectaret illos instituere: ac denique concordatum fuit, quod Rector, seu Abbas prædictæ Ecclesiae S. Joannis, qui pro tempore fuerit, pro recto cultu, & debito Ecclesia servitio tantum, ac nomine, & vice Domini Archiepiscopi tanquam ejus Officialis perpetuus habere deberet regimen dictæ Ecclesiae, & quidem cumulativè, non autem privativè quoad ipsum Archiepiscopum cum potestate Reætori, seu Abbatib[us] tributa ordinandi, & demandandi Hebdomadariis, Primicerio, Sacristæ, & Beneficiatis, ac deservientibus aliis omnibus ea, quæ pro debito ejusdem Ecclesiae regimine necessaria, & opportuna judicaverit etiam sub poenis corporalibus, & pecuniariis per Archiepiscopum, ejusque Curiam exequendas; prout latius ex tenore ejusdem concordie Summario Seminarii n.1.

Anno 1692. Primicerius dictæ Parochialis Ecclesiae unà cum tresdecim Hebdomadariis ejusdem exposuerunt sa. me. Innocentio XII. quod licet eorum Ecclesia ex pluribus signis etiam sacerularis, & Collegiata esse crederetur; attamen quia propter temporis diuturnitatem hujusmodi erectio in sacerularem, & Collegiatam Ecclesiam probari nequibat; ideo ad tollendum omne dubium super tali erectione petierunt, ut dicta Ecclesia S. Joannis Majoris in sacerularem, & Collegiatam Ecclesiam Apostolica auctoritate erigeretur, & Summus Pontifex eorum precibus annuendo dictam Ecclesiam in Collegiatam erexit constituendo Primicerium Primam Dignitatem, & tresdecim Hebdomadarios in totidem Canonicatus erigendo cum clausula tamen, ibi = Sinè alicujus, & præsertim dilecti filii nostri Joannis Pauli Ginnetti, qui perpetuum simplex,

plex, & personalem residentiam non requiriens Beneficium Ecclesiasticum Abbatiam nuncupat in dicta Ecclesia Collegiata erigenda obtinet, præjudicio.

Cupiens successivè idem sa. me. Innocentius XII. providere Seminario Alumnorum Metropolitanæ Ecclesiae Neapolitanæ, à cuius inopia, & redditum tenuitate sèpè sèpiùs angebatur, dum nunquam satis commendata pastorali vigilantia Ecclesiae Neapolitanæ præferat, & ejusdem Seminarii redditus augere intendens ad ampliorem Clericorum numerum inibi alendum, respiciens ad prædictam Abbatiam, seu Rectoriam Collegiata S. Joannis Majoris tunc à R. P. D. Joanne Paulo Ginnetto utriusque Signaturæ Referendario possessam, motu proprio devenit ad illius unionem favore Seminarii his verbis: *Motu proprio Abbatiam, seu Rectoriam &c. cum primum illa per cessum, vel decepsum vacare contigerit &c. prævia ex nunc, prout ex tunc, & è contra illius tituli collati vi suppressione, vel extinctione cum omnibus suis fructibus, redditibus, proventibus, juribus, adjacentiis, & pertinentiis, nec non quibuscumque Bonis ubique existentibus &c. etiam ex nunc, prout ex tunc, & è contra dicto Seminario &c. Apostolica auctoritate tenore præsentium unimus, anneximus, & incorporamus.*

Secuto obitu R. P. D. Ginnetti dictæ Rectoriæ, seu Abbatia Possessoris de Anno 1708. Rector, & deputati Seminarii unà cum Vicario Generali Eminentissimi Archiepiscopi prævia publicatione prædicti motus proprii unionis à sa. me. Innocentio XII. factæ, apprehenderunt possessionem Rectoriæ, ac illius fructuum, redditum, proventum, jurum, bonorum, obventionum, pertinentiarum, & emolumenterum quorumcumque, & in sequelam ejusdem motus proprii, & possessionis hujusmodi deputarunt Sacristam in præfata Ecclesia S. Joannis Majoris cum onere etiam exigendi redditus, & emolumenta ad Abbatiam spectantia.

Reclamavit ab hujusmodi deputatione Capitulum Collegiata S. Joannis Majoris ad Eminentissimum Archiepiscopum, qui auditis Partium prætensionibus, & voto juris peritorum Romanæ Curie amicabiliter dictas controversias sedare cu-

ravit cum acquiescentia Capituli Collegiatae, donec occasione deputationis alterius Sacrificiæ in locum primi, qui oneri suo renunciaverat, suscitatis iterum dissidiis inter Rectorem, & deputatos Seminariorum, nec non Capitulum Collegiatae S. Joannis Majoris, illisque delatis ad Sacram Congregationem Episcoporum, & Regularium, coram Eminentissimo D. Cardinali Fabrono Ponente cause concordata fuerunt inter Partes sequentia dubia.

29 Primò: *An unio Abbatia S. Joannis Majoris Neapolis facta Seminario comprehendat solùm fructus, vel etiam jurisdictiones, præminentias, collationes Beneficiorum, aliaque omnia jura.*

Secundò: *An illud regimen, & manutentio Ecclesiae, quæ spectabant ad Abbatem, de præsenti spectent ad Capitulum ejusdem Ecclesiae privativè ad Superiorum Seminarii.*

Tertiò: *An Sacrificiæ, aliisque Ministeri Inferiores, qui deputabantur ab Abbate, sint deputandi à Capitulo, vel potius à Superioribus Seminarii, & quatenus eleccio spectet ad Superiorum Seminarii.*

Quartò: *An teneatur illos eligere de Gremio Capituli?*

30 Quibus dubiis per Eminentissimum Ponentem propositis die 22. Novembris superioris anni prodit resolutio favor Seminarii mediante rescripto. *Ad primum negativè quoad primam partem, affirmativè quoad secundam; Ad secundum negativè; Ad tertium negativè quoad primam partem, affirmativè quoad secundam; Ad quartum negativè.*

31 Obtenta verò nova Audientia per Capitulum Collegiatae S. Joannis Majoris, & reproposita Causa in eadem Sacra Congregatione sub die 20. Martii præteriti super eisdem dubiis, nulla capta resolutione rescriptum extitit exquiratur votum Rotæ; Quo circa subscriptis duobus dubiis complexivis totius controversiæ unà cum altero ex illis cotincidente deputationem Ministeriorum, de quo in alia contemporanea decisione disceptandum proposui Dominis meis: *An unio Abbatia S. Joannis Majoris facta Seminario post erectionem Ecclesiae Parochialis in Collegiatam comprehendat solùm temporalia, & fructus Abbatia, vel etiam jurisdictionem, præminentias, collationes Beneficiorum, aliaque jura, quæ olim competitabant Abbatii in*

in statu Ecclesiae Parochialis; & habui responsum: Unionem Abbatiae, non comprehendere solum temporalia, & fructus Abbatiae, sed etiam jurisdictiones, præminentias, collationes Beneficiorum, aliaque jura, quæ olim competebant Abbatii in statu Ecclesiae Parochialis.

32 Ratio sic decidendi desumpta fuit ex qualitate unionis, in præsenti enim patet, unionem Abbatiae S. Joannis Majoris factam per san. mem. Innocentium XII. Seminario ejusdem Civitatis fuisse subjectivam, incorporativam, & cuiuslibet antiqui tituli penitus extintivam, dum Summus Pontifex expressè declaravit velle perpetuò unire, annexere, & incorporare Abbatiam prædictam cum omnibus suis fructibus, redditibus, proventibus, juribus, adjacentiis, & pertinentiis, in quibus terminis certum est unionem dici debere subjectivam, & tituli extintivam ex communiter animadversis per Angel. cons. 147. vers. sed uti fiat unio, Pax Jordan. elucubr. lib. 10. tit. 32. num. 11. Hoied. de incompatibilitate benef. par. 2. cap. 3. sub num. 3. Garz. de Benef. par. 11. cap. 2. num. 51. & num. 55. & 56. Barbos. de offic. & potest. Episc. alleg. 61. num. 23. & seqq. Murga de Benef. quæst. 4. sect. 6. num. 197. & seqq. Rota decis. 30. num. 1. par. 6. decis. 49. num. 1. & per tot. par. 15. decis. 421. n. 7. cor. Bich. decis. 320. num. 1. coram Emerix Jun. in Reatina unionis 25. Junii 1708. §. De unione, coram R. P. D. meo Scotto, & in Savonen. Restaurationis Parochialis Ecclesiae 8. Martii 1709. §. Quamvis, cor. eodem.

33 Posito autem, quod unio, de qua agitur esset subjectiva, incorporativa, ac præcedentis tituli extintiva; in planam consequentiam descendere videbatur, quod illa comprehendenter non solum temporalia, & fructus, sed etiam jurisdictiones, præminentias, collationes Beneficiorum, aliaque jura, quæ olim Abbatii ante unionem competebant. Hujusmodi enim generis unio subjectiva, & incorporativa suapte natura omnia juratam temporalia, quam spiritualia antiquo Posessori Beneficii uniti competentia transfert in Ecclesiam, cui Beneficium ipsum unitur ad tradita per Turrice. de union. Benef. cap. 4. n. 11. Rebuff. in prax. tit. de unionib. n. 49. num. 9. Ricc. in colle-

ctan. decis. collect. 869. Garz. de Benef. par. 12. cap. 4. num. 34. Rot. coram Seraph. decis. 1009. n. 4. ibique Adden. litt. A. cor. Arguell. decis. 34. num. 20. coram Emerix jun. dec. 320. n. 1. in rec. dec. 710. sub n. 2. part. 2. decis. 31. num. 17. par. 10. decis. 49. num. 8. par. 15. dec. 321. num. 1. par. 19. in dicta Reatina unionis 25. Junii 1708. §. De unione, & §. Posta, cor. R. P. D. meo Scotto, & in dicta Savonen. Restaurationis Parochialis Ecclesiae 8. Martii 1709. dicto §. Quamvis, cor. eodem.

Idque adeò verum est, ut in translatione jurium spiritualium resultante ex hujusmodi unione subjectiva, & tituli extintivi aiva comprehendatur etiam in favorem Ecclesiae, cui Beneficium unitur, jurisdictione, & jus visitandi antea competens Rectori Beneficii uniti, jus conferendi Beneficia, exigendi decimas, eligendi, & presentandi, nominandi Vicarios, & similia; ut de jure visitandi plena est decisio 304. coram Ludoviso de jure conferendi Beneficia Pignat. consult. 136. n. 4. & 5. tom. 1. Rot. dec. 257. num. 1. par. 3. coram Zarat. decis. 23. num. 24. & post Card. de Luca ad mater. de Benef. dec. 27. num. 19. de jure exigendi decimas eadem Rot. decis. 320. num. 1. & 3. cor. Emerix Jun. de jure eligendi, & presentandi Rot. dec. 102. n. 1. par. 11. recen. in Cracovien. Monasterii 4. Decembris 1699. §. Maximè, coram Eminentissimo D. mro Card. Caprara, ac demum de jure nominandi Vicarios Turrice. de union. cap. 4. n. 53. Rot. in Tarraconen. Parochialis de Vimbadino 15. Januarii 1706. §. Avulso, coram R. P. D. meo Ansaldo, & in Leodien. Beneficij 25. Februarii 1707. §. Seorsim, coram eodem.

35 Quæ quidem incontrovertibilia juris principia, ed certius visa sunt procedere debere in præsenti hypothesi, in qua Summus Pontifex in literis Apostolicis unionis motu proprio concessis, non solum usus est verbis, unimus, anneximus, & incorporamus de per se aptis importare unionem subjectivam, ac tituli extintivam, ac per consequens translationem quorumcumque jurium licet spiritualium ex authoritatibus supra allegatis, sed ulterius adiecit amplissimam, & universalem clausulam cum omnibus suis fructibus, redditibus, proventibus, juribus, adjacentiis, & pertinentiis; sub cuius concessio-

nis

nis generalitate, nemo est, qui dubitet comprehendi jurisdictiones, præminentias, omniaque alia jura incorporalia, & spiritualia, quæ ad Abbatiam unitam spectabant, & pertinebant juxta doctrinam Innocent. in cap. quo ad sedem n.2. vers. & dic quod pertinentiarum nomen de restit. spol. Rot. coram Zarat. dec. 23. num. 21. & seqq. coram Emerix Junior. decis. 320. n.3. in rec. dec. 710. n.3. par. 2. decis. 352. n.8. par. 4. dec. 207. num. 11. par. 6. decis. 102. n.14. par. 11. decis. 809. num. 10. par. 18. decis. 321. n.2. par. 19. & in dicta Savonen. Restauracionis Parochialis Ecclesie 8. Martii 1709. §. Quamvis, coram R.P.D. meo Scotto.

Non subsidente, quod cum ante unionem, de qua agitur, Summus Pontifex immutasset statum Ecclesie S. Joannis Majoris de Parochiali in Collegiatam constituendo ibi novum caput, scilicet Primicerium, utique extinctæ remanerint omnes prærogativæ Spirituales, jurisdictiones, & præminentiae olim competentes Abbatii in statu Parochiali, ac per consequens unio subsecuta Abbatie transferre non potuerit in Seminarium nisi ejus redditus, & Bona temporalia, non autem jurisdictiones, & prærogativas per mutationem Status Ecclesie transfas in novum caput. Objectum quippe nullam visum est habere subsistentiam in facto, nec relevantiam in jure; In facto quidem, quia de tempore initæ concordia inter Archiepiscopum, & Abbatem, nempe anno 1584. jam dicta Ecclesia reperiebatur in statu Collegialitatis, ut patet ex ipsa concordia, & ex Apostolica confirmatione desuper subsecuta. Et quamvis Summus Pontifex de anno 1692. ad tollendam quamcumque ambiguitatem, quæ circa qualitatem Collegialitatis dictæ Ecclesie ob temporis diutinatem oriri posset, illam in Collegiatam erigere professus fuerit; Id tamen non egit per viam plenariæ innovationis, seu permutationis, sed potius per viam declarationis, ut clarè continebat petitio eidem Summo Pontifici exposita per Primicerium, & Hebdomadarios, ut patet ex tenore Bullæ erectionis d. Summ. Seminarii num. 3., quæ declaratio in sub 36 stantia nihil de novo addit, sed simpliciter ostendit, quid jam per antea factum

erat ad Text. in leg. heredes palam §. Si quid ff. de Testam., & tradita per Decian. conf. 2. num. 10. Gratian. disceptat. for. cap. 464. num. 19. Cartar. decis. 16. num. 19. Rota in rec. decis. 453. n.2. par. 1. dec. 159. n.15. & decis. 393. n.6. par. 15. & dec. 16. n.6. & seq. par. 17.

37 Minusque relevabat in jure supradictum objecrum quia prætensa erectio Ecclesie S. Joannis Majoris in Collegiatam facta fuit cum clausula præservativa sine alicujus, & præsertim Dilecti Filii nostri Ioh: Pauli Ginnetti (qui tunc erat Abbas) præjudicio, quæ quidem clausula operabatur; ut per supradictam erectionem in aliquo diminui non possent jura Abbatie, & Abbatum pro tempore jurisdictione, ut firmant Lotter. de re benef. lib. 1. quæst. 40. n. 278. Rot. coram Puteo dec. 291. num. 17. lib. 1. in rec. dec. 435. n.9. par. 18. dec. 171. pariter n. 9. par. 19. & in Romana Fidei commissi Mutii de Bubalo 18. Junii 1700. §. fin. coram Reverendissimo Domino meo dell' Olmo Episcopo Conchen. Frustrè autem clausula prædicta restringi contendebatur ad vitam R.P.D. Ginnetti tunc Abbatis, ex quo Papa illum nominatum expresserit in Bulla. In illa etenim non solùm fit mentio præjudicii R. P. D. Ginnetti, sed cuiuscumque alterius personæ, ibi sine præjudicio alicujus, & præsertim &c. Et in omnem casum, cum præservativa jurium adiecta fuerit favore R.P.D. Ginnetti veluti Abbatiale dignitatem obtinentis, palam exinde fit, quod cadem clausula prolata fuerit ad præservandam jura non personalia dicti Ginnetti, sed ipsius Abbatie, quodque illius nomen expressum fuerit demonstratiè dñataxat ad designandum, quis eo tempore eamdem Abbatiam possideret, exemplo Rectoris contrahentis nomine Beneficii, qui quamvis proprium nomen expendat, contrahere tamen dicitur nomine Ecclesie, & contractus sic initus eidem Beneficio, seu Ecclesie adscribitur, illamque etiam post Rectoris mortem afficit, ut inquit Card. de Luc. de locat. & conduct. sub num. 2. vers. aut agitur, Rot. in rec. dec. 75. n. 4. & seqq. par. 11.

Prout nec obstatre potuit, quod Summus Pontifex in præfata erectione Ecclesie in Collegiatam, Primiceriatum jam antea existentem in principalem, & unicam digni-

gnitatem ejusdem Collegiatæ erexerit cum facultate in actibus quibuscumque capituloibus praessendi, & præminentiam habendi, ut proinde dicendum sit, quod abstulerit Abbatii omnia jura præminentia, & jurisdictionia, quæ olim ei competebant in antiquo statu Parochialitatis, illaque transferre voluerit in dignitatem noviter erectam, cum in una eademque Ecclesia non possint dari duo capita. Etenim prædicta erectione Primi-
ceriat in dignitatem principalem, & unicam valuit quidem tribuere eidem Primicerio jurisdictionem, & præminentiam coherentem primæ Dignitati, ac jus moneundi, & corrigendi oretenus Canonicos, & alios de Choro, prout in specie hujus Primicerii definivit Congregatio Sacrorum Rituum in decretis exhibitis, in Summ. Additionali Seminarii Num. I., nunquam verò importare potuit acquisitionem jurisdictionis jam competentis Abbatii, quæ non obstante asserta nova erectione in suo esse remansit; ut enim in mutatione Status Ecclesiæ extinguantur jurisdiction, & Privilegia alicujus, & in novum caput pertranscant, opus est, quod illa sint penitus incompatibilia cum statu immutato, ut docet Rot. coram Seraphin. dec. 1444. n. 10. & coram Emerix jun. dec. 1029. n. 5., nulla autem considerabilis erat incompatibilitas inter jurisdictionem concessam novo capiti, & alteram jam competentem Abbatii; Illa enim resolvebatur in correctionalem non nisi quam oretenus exercendam, ut ex præcitatibus decretis Sacrae Congregationis Rituum: hæc verò exercebatur per Abbatem tanquam Officialem perpetuum Archiepiscopi, illiusque nomine, ac vice, & quidem cumulative, non autem privativè ad normam concordiæ anni 1584. unde quemadmodum nulla implicantia, nullaque monstruositas assignabilis esset, si Archiepiscopus ordinariam jurisdictionem, quam habet in eadem Ecclesiæ, exercebat, vel personam alteram in suum Vicarium, & Officialem præligeret, qui recto ejusdem Ecclesiæ regimini praesset, ita nullum inconveniens assignabile erat ex eo, quod Abbas tanquam perpetuus Officialis Archiepiscopi juxta tenorem concordiæ compatibiliter cum jurisdictione correctionali novo capiti assigna-

Paris V.

ta, potiretur sua jurisdictione in diversa specie, quæ jurisdictiones non implicant inter se, neque præferunt monstruositatem duorum Capitum, ut in consimilibus terminis circa compatibilitatem jurisdictionis correctionalis in levibus, & ordinariæ, ac supremæ dictum fuit in Derthusen. jurisdictionis super gravibus 4. Martii 1692. coram bo. me. Pio, & in Derthusen. jurisdictionis 18. Junii 1696. cor. eodem.

39 Fermo itaque manente, quod ante unionem Abbatiae factam Seminario omnia jura ejusdem Abbatiae spectarent ad Abbatem, & per assertam mutationem Status Ecclesiæ translata non fuerint in Primicerium, tanquam novam Dignitatem inibi erectam, recurrebant semper præmissa fundamenta, quod per subjectivam Abbatiae unionem factam favore Seminarii omnia jura tam temporalia, quam spiritualia eidem Abbatiae competentia, sive tam jurisdiction, quam jus conferendi, & eligendi in idem Seminarium transfusa fuerint, ut supra probatum est à §. Posto autem cum seqq.

Nullatenus offidente, quod unio facta legatur prævia extincione, ac suppressione tituli Abbatialis, ibi = prævia ex nunc, prout ex tunc, & è contra illius tituli collativi suppressione, & extincione, quæ suppressio operatur, ut Beneficium, quod unitur, amittat omnes prærogativas, & jura personalia, quæ habebat, & assumat privilegia, & jura Ecclesiæ, cui facta est unio. Quamvis enim verum sit, quod inter plures effectus, quos producit unio subjectiva, & extinctiva tituli, connumeretur ille extictionis, & amissionis omnium prærogativarum, & privilegiorum quoad ipsum Beneficium, ex quo non existit Beneficiatus, qui illis frui, & gaudere possit, ex hoc tamen non sequitur, quod dictæ prærogativæ, & privilegia taliter per beneficium, seu dignitatem suppressam deperdita sint, ut de medio penitus sublata, seu extinta remanserint: Concordia enim, ac ubique recepta sententia est, quod prædicta jura, quæ in ipsa dignitate, seu titulo per unionem extinto consistere amplius non possunt, & quæ proinde per unionem subjectivam, & extinctivam tituli pereunt quoad ipsum Beneficium unitum; Non tamen pereunt

R

quoad

quoad Superiorem Monasterii, Seminarii, seu alterius Loci, cui facta fuit unio, in quem jura Beneficii uniti transeunt, & transfunduntur, ut præcæteris absque contradicatore concludunt, *Murga de Benef. quæst. 4. divis. 5.*, qui postquam sub n. 160. & 162. pro primo, & secundo effectu talis unionis adduxit extincionem, & suppressionem tituli Beneficii uniti, illiusque prærogativarum, & privilegiorum cum successiva assumptione prærogativarum, & qualitate Beneficii principalis, cui facta fuit unio, transeundo ad tertium effectum sub n. 165. ita inquit = *tertius effectus unionis est, ut omnia emolumenta, actiones, & jura Ecclesiæ accessoriæ per viam incorporationis, & ad mensam unitæ ad Ecclesiam principalem, cui fuit unita, pertineant, & transeant.* Garz. de Benefic. par. 12. cap. 2., qui pariter postquam sub n. 18., enunciavit Beneficium unitum omnes suas prærogativas amittere num. 39. subdit = *per istam tamen unionem omnia emolumenta Beneficii uniti transeunt in Ecclesiam, cui facta est unio, & ad eam pertinent, & cum ipsis concordant modernus Roman. discept. Eccles. 9. num. 3. Barbos. de offic. & potest. Episcop. alleg. 66. num. 38. Alden. ad Gregor. dec. 304. litt. A. Rota coram Seraphin. dec. 1009. num. 4. in recent. dec. 710. num. 2. par. 2. dec. 49. n. 7. par. 15. dec. 809. n. 9. par. 18. tom. 2. & in Savonen. Restauracionis Ecclesiæ Parochialis 8. Martii 1709. §. Quamvis, coram R.P.D. meo Scotto.*

Nec momenti visum est, quod Summus Pontifex tam in procemio, quam in dispositiva Bullæ unionis declaravit intentionem suam esse; ut mediante unione sublevaretur, paupertas Seminarii, & augeri possent ejus redditus temporales, ibi = *mente revolvebamus, quod subfidiis redditus prædictos augere possemus ad ampliorem Clericorum numerum inibi alendum = & inferiùs, ibi = dicto Seminario, illiusque manutentioni, & incremento, & augmento numeri alumnorum = & rursus in fine, ibi = sed tanquam pro manutentione, & augmento Alumnorum dicti Seminarii = unde cum præminentia, & jurisdictiones, de quibus agitur, nihil commune habeant cum augmentatione reddituum temporalium Seminarii, & ampliatione numeri ejus Alumnorum; dicendum pro-*

factò veniat, quod ipse Summus Pontifex voluerit solum facere unionem fructuum, ac reddituum temporalium Abbatiae, non autem jurisdictionum, & præminentiarum: Quoniam tametsi causa prædicta occurrendi indigentiis Seminarii Pontificis animum impulerit ad unionem faciendam, illaque fuerit etiam in narrativa expressa: Cum tamen unio facta appareat de Abbatia subjectivè, & accessorie una cum omnibus illius juribus, adjacentiis, & pertinentiis, præfata causa impulsiva restringere, ac coarctare non valuit dispositivam, quæ ex vi, & efficacia unionis prædictæ omnia etiam spiritualia comprehendit, non enim narrativa tantum dispositionis, sed ejusdem dispositionis conclusio attendi debet ex collectis per Murg. in addit. ad dec. 4. impress. post tractat. edit. in Constit. Apost. n. 26. Rota post ipsum dec. 5. n. 9. & dec. 5. in rec. decis. 49. num. 8. par. 15. & in Vicen. Parochialis, seu Vicariae 24. Novembris 1694. §. Sicuti, coram bo. me. Muto.

42 Nullius denique efficaciam visa est Dominis animadversio, quod in Elogio, seu marmoreo monumento inscripto super Ostio Seminarii enuncietur eidem Seminario ex Abbatia Sancti Joannis Majoris indulgentie sa. me. Innocentio XII. acquisitum fuisse opulentissimum censum, nulla facta mentione jurium, & præminentiarum. Hujusmodi namque enunciativa per Elogii compositorem laconice facta in prædicto marmoreo monumento, quamvis principaliter referatur ad fructus, nullamque facit mentionem jurium, & præminentiarum, ad nihil tamen conferre valuit pro stabilienda comprehensione, vel exclusione jurium spiritualium in unione prædicta, resistente semper vulgari regula, quod quis in pluralitate jurium sibi competentium, illorum aliquod enunciando, vel allegando, cæteris nequaquam renunciare dicitur, minusque illorum incompetentiam fateri juxta monitum, Rot. coram Cerro dec. 97. num. 29. coram Dunozzett. jun. decis. 79. num. 12. & dec. 96. n. 10. & in rec. dec. 9. n. 20. par. 19.

Et ita post habitis reliquis exceptionibus minoris relevantiæ, in acerrima Partium digladiatione conclusum fuit.

R.P.D.

Rmō MOLINES DECANO

Neapolitana Unionis super deputa-
tione Ministrorum.

Lunæ 23. Iunii 1710.

43 **U**na cum dubio contemporaneè pro-
posito super comprehensione Ju-
rium, & præminentiarum in unione Ab-
batia S. Joannis majoris Civitatis Nea-
polis facta per san. mem. Innocentium XII.
Seminario Alumnorum Metropolitanæ
Ecclesiæ ejusdem Civitatis, de quo in al-
tera decisone hodie coram me edita,
consului pariter Dominos meos super altero
dubio respiciente deputationem Mi-
nistrorum, *An Sacrista, aliisque Ministri*
inferiores, qui deputabantur ab Abbatie, sint
deputandi à Capitulo, vel potius Superioribus
Seminarii, & quatenus electio spectet
ad Superiores Seminarii teneantur illos eli-
gere de gremio Capituli, & prodidit resolu-
tio Electionem spectare ad Superiores Semi-
narii, & illos non teneri eligere de gremio
Capituli.

44 Quo enim atinet ad primam dubii par-
tem circa electionem activam Sacristæ,
aliorumque Ministrorum inferiorum,
nempe Organistæ, Clericorum pro servi-
tio Ecclesiæ, & similium, censuerunt
Domini illorum activam electionem spe-
ctare ad Superiores Seminarii, quia si jus
illos deputandi, & eligendi antiquitus
spectabat ad Abbatem, de plano seque-
batur, quod per subjectivam unionem
Abbatia Seminario factam idem jus de-
putandi, & eligendi una cum aliis juribus
Beneficio unito competentibus pertrans-
ierit, & translatum fuerit in Superiores
Seminarii, cui facta fuit unio, ut probat
altera decisio §. *Poista autem cum seqq.*

Certiūs autem, quia per supradictam
unionem Abbatia Seminario factam, in
illud non solum translata fuerunt jura
præminentia, & honores Abbatii com-
petentes, sed etiam onera eidem Abbatii
infixa solvendi scilicet salarium Sacristæ,
aliisque prædictis Ministris inferioribus,
& subministrandi paramenta, & vasa sa-
cra, aliaque omnia necessaria pro Divi-
norū celebrationē, ut proinde omnis
45 justitiae, ac æquitatis ratio postulet, quod

Pars V.

si Seminarium subit onus, & incommo-
dum dictarum expensarum, & manuten-
tionis Ministrorum, frui quoque debeat
commode deputationis eorumdem ad
Text. in l. secundum naturam ff. de reg. Ju-
ris cum concordantibus adductis per Gra-
tian. discept. foren. cap. 374. num. 21. Surd.
de alimento. tit. 6. quæst. 11. nu. 20. & seqq.
Fontanell. de pactis nupt. claus. 6. gloss. 2.
part. 3. num. 11. Rota decis. 1222. num. 6.
coram Emerix jun.

Non relevante, quod Summus Ponti-
fex Innocentius XII. san. mem., in Bulla
erationis Ecclesiæ S. Joannis Majoris in
Collegiatam concessit facultatem Capi-
tulo condendi statuta circa administra-
tionem bonorum spiritualium, & tempo-
ralium cum jure deputandi, & amovendi
Officiales, & Ministris, ut pater ex illis
verbis *Et modernis, & pro tempore exi-*
stentibus Primicerio, & Canonicis &c. ut
pro Collegiate Ecclesiæ, & illius Primicerii,
& Canonicorum Mensæ Capitularis, Sacri-
stæ, illarumque omnium rerum, & bono-
*rum &c. prospero, & felici regimine, gu-*bernio, & directione &c. Officialibus, &*
Ministris Collegiate Ecclesiæ per præsentes
erectæ necessariis deputandis, & amovendis
servitiis, & Ministris per ipsos obeundis,
quæcumque statuta, ac ordinationes, capi-
tula, & decreta licita tamen, & honesta,
ac Sacris Canonibus, & Concilii Tridentini,
& Constitutionibus Apostolicis minimè con-
traria, & per Ordinarium prius examinan-
*da, & approbanda edendi.**

Quandoquidem ex prædictis verbis so-
lum resultat, quod Capitulo tributa fuit
facultas condendi statuta super adminis-
tratione bonorum Mensæ Capitularis,
Primicerii, & Canonicorum, & deputan-
di Ministris Sacristæ spectantis ad ipsum
Capitulum, & Canonicos, sub ea tam-
en lege, ut dicta statuta non deberent
essè contraria Sacris Canonibus, Sacro
Concilio Tridentino, & Constitutioni-
bus Apostolicis, quodque deberent con-
firmari, & approbari ab Ordinario, in
præsenti autem casu non agebatur de ap-
probatione statuti facti à Capitulo, nec
deputatione Ministrorum pro admini-
stranda, & gubernanda Mensa Capitula-
ri, & bonis Primicerii, & Canonicorum,
sed quæstio vertebatur circa deputatio-
nenem Sacristæ, qui curam habere debeat

R 2

de

de paramentis sacris, aliisque rebus necessariis ad Divinum cultum subministrandis per Seminarium, & circa deputationem aliorum Ministrorum pro gubernio eorum, quæ spectant ad dictum Seminarium, in quibus terminis cessare visa est facultas Capitulo tributa eligendi Ministros, ut in simili dictum fuit in decis. 1083. per tot. coram Emerix junior.

Deveniendo ex his ad electionem passivam in omnem casum prætensam per Capitulum, resolutum fuit Superiores Seminarii non teneri eligere Ministros de gremio Capituli: qui enim habet à jure facultatem eligendi, seu nominandi non coarctatur ad certum genus personarum, sed potest semper quemcumque sibi magis benevolum eligere, seu deputare, ut monent Guttier. practic. quæst. lib. 2. quæst. 67. nu. 3. Caſtill. controv. tom. 5. cap. 67. nu. 4. & 6. Rota coram Emerix jun. decis. 762. num. 4. & seqq. & in rec. decis. 96. nu. 17.

par. 17. Idque quoad electionem, & deputationem Sacræ conforme etiam erat dispositioni Cæremonialis Episcoporum lib. 1. cap. 6. ibi = *Affumendus autem est de gremio ipsius Ecclesiæ, vel aliunde, prout magis expedire videbitur, nec adversari videbatur decisio 645. nu. 2. & seqq. coram Seraphino*, in qua firmatur, quod cùm regimen Ecclesiæ pertineat ad Capitulum, ideo deputatio Ministrorum facienda sit ab eodem Capitulo de gremio Capitulari, quia prædicta decisio fundatur in consuetudine, ut ex lectura. Unde potius rectorqueri potuisset, quia si in præsenti deputatio Ministrorum, semper fieri consuevit ab Abbe quoad personas sibi benevisas; Ita pariter nunc facienda videtur ad libitum Superiorum Seminarii, in quod per sapientiam unionem subjectivam transfusa, & incorporata fuerunt omnia jura eidem Abbatи competentia.

Et ita utraque &c.

C A N O N V I I.

CONCILII TRIDENTINI Sess. XXIV. Cap. III.

Patriarchæ, Primate, Metropolitani, & Episcopi propriam Dioecesim per se ipsos, aut si legitimè impediti per suum generalem Vicarium, Visitatorem, si quotannis totam, propter ejus latitudinem, visitare non poterunt, saltem majorem ejus partem, ita tamen, ut tota biennio per se, vel Visitatores suos compleatur, visitare non prætermittant: Et infra. Patroni verò in iis, quæ ad Sacramentorum administrationem spectant, nullatenus se præsumant ingerere, neque visitationi ornatorum Ecclesiæ, aut bonorum stabilium, seu fabricarum proventibus immisceant, nisi quatenus id eis ex institutione, ac fundatione competit; sed Episcopi ipsi hæc faciant, & fabricarum redditus in usus Ecclesiæ necessarios, & utiles, prout sibi expedire magis visum fuerit, expendicurent.

COM.